

湘綺樓日記

二十

湘綺樓日記

光緒二十四年戊戌

戊戌三月甲戌朔雨寒甚檢日記書呂冊賀門生來居前堂東房城中夫
力還云諸女昨晨上船北風壯怒未知成行否送黃參贊日本志來搜
輯雖勤竟無所用不知彼國亦喜之否若作小說反有可觀顧忌既多
詞又雅正便成無用也馬卜兒百姓眠竟酣然矣

二日寒陰頗見日色理日記寫呂冊看黃志馮甲亦成黃鶴矣竟日倚閭
欲步濡泥還臥占書忽聞轎至則滋真攜黃孫已入門乃反從姜奮步
上云船卽至矣遣轎往迎三反乃俱到卜女湘孫復真也張嫗步從周
嫗獨後來見余正值鋪牀雞鳴乃寢通夕煊和行李闇至
三日大晴佳節良辰猶有餘寒移席外房開窗復掩不勝東風拂面也午
攜諸女踏青家紫桐兒來與周浩翁師子兒周生同至食饌旋稍飽客

來已暮猶未欲飯王兒之樹芙塘昨夜被劫盡縛人被蒙之席卷衣物
以去愚哉劫也諸女各占窗几明淨可喜余但書呂冊一條夜問諸女
劫至當如何俱云避之因告以德恭人前事我所以不如之故以婦女
不可臨時爲避匿計

德事在丙戌日記

迎船夜來喫齋卵苋饊乃寢

四日晴始煊易縣衣起行李湘孫今日生日正廿歲以未卒哭無湯餅也

招團總來議設樹藝局縣令送卷包來早寢

五日陰風懿兒假歸迎兄嫂輔廷來掃墓因弔彭婦殯不飯去召縫工木

匠補衣安牀夜欲雨復止桃李花

六日陰許外孫來云周鐵已被陳撫捉去云毀天主當治罪也盈老少來

皆未飯去看課卷周尙德論富弼甚有詞藻及再閱他卷乃鈔襲來者

殊可怪歎此題亦有可鈔襲則無所不有未二更卽寢始聞蛙

七日陰搢子早來

云周鐵募勇

旋去張星二來言縣傳都總令妻病故云云議

種藝局事閱童卷畢百本亥寢

八日晴有雨看童卷彭鶚來問富弼使虜余云遣往議和猶使長工議水分必無死法地在千里之內亦非遠適而自誓以死不發家書則恇怯甚矣宋主動容猶談虎色變爲忠臣所恐嚇也宋人習氣如此不足論夜酣睡至曉解衣乃寢

九日陰煊童卷三百本閱畢卯金刀來桃李盛開夜亦早睡

十日晴晨課畢飭船下漣口至縣到沙灣月正中矣閤行入賓興堂唐春湖之子屏丞在寓待朱倬夫來已二更略談卽眠

十一日晨起至石珊處問公屋便至許慶豐借米篩還堂朝食二萬郎來飯後與蕭某至書院取公穀正遇蔡天民同出買麻石板綾還昇出弔

陳明府小坐仍還寫陳妻挽聯

早傳聞官閣清貧依然佐讀青燈又見
郎君新射策曾享盡人間富貴今日

滿城紅雨正逢
寒食夜啼鵲

陳妻葉故爵閣督之小女所謂廿六貓主人筠仙所羨

者蔡翁攜蓮兒來龔吉生來致陳公意必留主講余云以不考不上學
爲妙顏太守方斷斷不可之宜先避也又云何藩十七去李梟明日署
藩諸事粗了上船還宿沙灣

十二日晨陰見東方曉霞有雨徵令移船入漣甫至楊梅洲大風已發雨
從而至遂成狂風甚寒小澗猶不能進三十子衣盡溼浪潑入船方僮
助之船內外皆溼僅儀袁河方僮上岸買米夜遂不來

十三日雨小風止三十子不能榜一日竭蹶僅至壩下顧車運石遂助榜
船到家夕食華一華三來借宿未遑與談二更便寢

十四日雨寒偶繙廿年日記有感碑志之作取嚴輯校張集蔡文將勒一
書用便尋檢遂坐半日周生來云周鐵下獄矣亦一奇也未夕假寐二
更解衣四更復醒將曙酣寢

十五日戊子清明陰仍寒晨起甚早校蔡文約鄰農設樹藝局卅二家來

者三分有二一蕭生不約而來盛張黨也然頗有條呈非附和者竟日乃散憊矣石珊又夜來旋去早睡

十六日陰早起將督土工工殊不易朝食復報輿攜婦來大運家具遂盡一日召匠漆卓几張子持來前甲總來請發傳單亦紛紜移晷留張飯去已夕矣夜月徘徊三更未夢鷄鳴乃寢昨始聞鷄今乃無聞

十七日晴陰晏起改路就樹立門外督工懿兒來移室居之新齋未興工暫居半山室中作書告縣令以種植之事改周生所作朱氏譜序周約能得我文其兄便可得瞰飯處此文有用卽援筆作之名爲改耳仍令交倬夫原手一就兩用也初昏便息二更乃起解衣夜雨聞鷄

十八日午前仍雨復陰校蔡文畢碑銘而止以將大錄漢刻石也全文無石鼓文急就章亦未爲全睡未著

十九日晨雨午風而霽遣迎四婦母子來鄉居工人起甚晏乃反得晴澗

懶之利也申正楊氏婦來生孫將兩月始奉以見 孺乳嫗旣皆見乃
令弔湘孫遂飯始見我女書及黃年子書陳撫監禁周孔徒牒易甥孫
壻時務議新學鬼話一絡流可與康祖詒抗行早睡早醒

廿日陰始督工開土而四人共鉏一畝地知其混飯遣去尋周生更招工
周生亦不知何處去矣夕團總來鈔漢刻石文

廿一日晴猶寒鈔漢碑講范史論馬武請伐匈奴文情甚美爲班書所不
逮徐甥來送點心並其父書求歐文彭鸚再來

廿二日晴朝課畢出無車令匠作一轎窗三時不成問銀田寺去此幾里
云一舍程當往返已晡矣乃飛足而行至新橋張六不能進蹣跚緩步
日斜竟至團總議遏糴云從衆意也雖遏猶積但名不美耳余云若攔
路奪米吾必治以劫賊之法衆人皆飯余與韓某等同席便辭出見一
肥人云唐鴻圖弟也弟十近在二甲門有美塘往來皆過焉團局喚一

夫送我復飛足而還至唐門正黑乞火便行到家初更耳兩時馳六十里快於馬少坐便睡夜半酣寢不復知人

廿三日晴猶未煊鈔漢碑張公仙人九歌已錄而不憶記性不如人如此楊家請周歲飯四婦不能往遣真女往代賀午去周嫗從行待至二更不還余睡意甚濃遂睡賀生從學而不知門遣諭令去石珊來

廿四日晴始不可繇露重不可行昨夕與搢子登前山望所居岡巒甚有氣勢試往尋之適遇石珊三人同往屨襪皆溼乃還鄭商來言開山事便去地師來定中封蓮弟來真還未知也賀生告去夜早睡半夜醒鷄三鳴乃寢

廿五日晴煊可單衣築牆人揮汗蔭喝如五六月也朱通公來潤子來乞食三日矣又病瘡與約三日不語便收之先移之客房石珊蓮弟並去九妹之女蔡攜小女來居之對房晨起復寢東方昌矣

廿六日晴熱鈔漢碑遣女蔡去約到城爲謀生計內外僮奴曝衣初夜小睡起食粥夜半寢正酣忽聞喚聲以爲紉女在後房起看乃知謬誤殘月正明輿兒聞開門聲起看也因出詢之還寢天曙矣

廿七日晴熱將雨矣風暖似暑石珊又來團總來請開山費諭以錢出於土不患無用也周生挾文干茶商八日不還殊可歎怪晚問石珊行醫何爲故逃避石珊遂去

廿八日陰晨有雨已而復晴但稍涼耳成六來送詩正郭孫之匹也於其鄉人顧少所可膏醯已罄冲菜正當時將入城求滋味因遣人至省宅一看附去與乾元論租穀事鈔漢碑甚勇

廿九日晴朝食後往後山念當有人來及出則船夫來云水涸不能上問卷封云先十日來矣又一卯金也卯金亦來鈔漢碑黃孫往橋市看戲放學一日講馬援傳甚有生趣午睡甚久夜寢未適

晦日晴周傭來上工馮甲運煤木匠架椽紛紜一日滋再看戲有疾不依禮兩功喪不廢樂也舊周傭與卯金俱下縣與書蕭某借錢周生來盛生員來告會試題並送土儀四老少來言封廩事今日癸卯穀雨燕子頻來呢喃軟語蓋去年生雛故今年房房有定巢者

閏三月甲辰一日晴熱未午起雲梅林黃姓引心蘭少子來字素六年廿四云比遭喪負債未專學也留居外齋將課以雜文遣其工力先去黃請作路碑正錄漢刻石諾之黃遂辭去四老少亦去頃之雨作對子未燥不能去矣滋出看戲遂不能歸大風衝門戶竟夜不寧

二日雨晨炊失飪數誨傭工

所謂周四者

遂逃去羅研翁所愁者余不畏也鈔

漢碑傍晚滋還周嫗後至風猶未息待粥乃睡

三日陰譚郎婦家遣人來迎午去贈以論語似不甚解也四老少亦去欲仿漢修道記作碑竟未能模古姑塞其請耳

四日晴欲寒盛張復來與同尋周生因與周生至石泥塘更要周厚瀛同至顏閣塘從石道分道遇石珊同還入講書畢遂暮周備還致銀物衡卷夜雨卜女聞大父喪令發哀

五日雨田始優渥一犁水活鄉城敝人冀旱樂災者無所藉口矣看衡卷周生來云湘潭不及也賦亦有成章者寢聞雷醒將曙復寐

六日雨晨閱衡卷畢作書薦盛秀才於衡府送卷陳兵備復程旣樵書託帶呢線片告齋長問櫻桃出題甚窘竟費半日工始聞布穀

七日雨晨遣衡信去檢得隸釋校對刻文甚可遣日不知日之夕也

八日晴校寫漢碑竟日盛張復來言王賡虞逝矣

謠言也入相矣

追想生平不勝

悽感晡後雨淅淅遂至終夜四更醒旋寐

九日陰雨倉唯兩石穀遺覓穀米馮甲云無乃知義倉之益鄉間窮乏至此獨立難矣午炊竟斷出衡米令僮嫗爨之廚下已奪食矣

十日晨雨至朝食後未已船來載瓦甲匠均不知何往余乃下縣昇往湖
瀕船又不見遣問云獨去矣還講書遂留一日郭伋乃郭解玄孫亦貳
臣也

十一日晴滋疾小愈馮甲面謾斥之愚人多詐極爲可恥羊續清貧閉郭
拒妻不輸左騶反得郡賻殊足助談柄連得倬夫兩書皆言潤筆周生
坐索有夏南琴之風亦所謂活報應

十二日晴校漢碑頗有所樂將下縣而船已往石潭方治土階因停一日
衡信還夜早寢

十三日晨雨旋晴遣覓船人往來雲湖遂至日昃飯於姜畚至城猶未昏
倬夫已出留宿賓興堂

十四日陰有雨時作時止請蕭生徐甥購辦家用零星五十元撒手空矣
午間登舟小睡倬夫以舁來迎招喫燒豚並迎朱黃茅楊梅生余先過

楊宅看舜生文已通矣想又是許生所改也其樂毅論云毅當聲田氏篡姜之罪頗有所見還許兄旋來夜待廚人甚久食畢已將鷄鳴會試信至而不見全錄

十五日陰晴今日戊午立夏昨約與二朱冶游送春期以已初向午黃茅未來因登舟解維而歸行東岸幾一時許飯於叢河至南柏塘已夕乘月還家諸女留夏羹待我半夜乃寢

十六日大晴甚熱始簾欲看桂卷以將上湘留爲舟課仍鈔校漢碑夜月十七日陰涼午前有雨遣方桂入城取赴文因與書仙童冒雨便發得楊生書送文稟云朝官諱言利釐鹽歸赫德以償債息耳非整頓也外夷不取我土地而能權關市殆先王譏征所不料此所謂築台於秦者四婦姊妹均作望海詩亦不謀同詞有類元白慈恩之作

十八日晴文柄自衡來一無所知似桃源仙人出洞馮甲至石潭亦一日

不來方四復病

十九日晨雨復寒楊篤吾兄弟冒雨來朱巡檢陳縣令遣人來弔俱有賻贈隨復書謝之朱送我雙井茶則受以自啜篤吾不飯而去出留之則已去矣留仲子居外齋諸女以嫂葬停課一日方貴還見千佛名經幾成城旦書矣

廿日癸亥營葬次婦雨不能行禮欲往壙看視亦不能行冒雨往屨鞮俱溼正旁皇間周生引一人來脫雨鞮階前乃著以往開方中太淺令加深二尺日垂暮矣雨稍止涂已畢啓草繩繫柩未引而斷急以布代之女婦皆望哭以過喪仲子步送余欲待下窆鞮主久待乃還具食酉正始下大雨旋至遂掩而還從已鷄鳴

廿一日大雨朝起庀具爲次婦具卒哭之薦乃知祔禮用尹祭及取左盥折俎之說改定禮注一條今旣不祔略依三虞告奠而已湘孫制杖爲

主日中行事尙不乖節朝祥暮歌夜遂無哀非所謂不敢不勉者然已勉三月矣文柄周嫗誼爭俱斥令睡余睡稍晚於昨而鷄未鳴

廿二日大雨復常課講漢書張佚爭援殿本作戚援二字甚生校漢碑則多識破體甚以爲能袁向學官龔吉生均專使來弔

廿三日陰晴楊生弟去余欲上衡而隸釋續未畢校盡日勘點兼鈔所遺至夜竟畢書馮姓扇一柄唯成姓詩未看百日不摸牌矣夜呼諸女作

四圈

廿四日大晴攜黃孫上衡自授之讀便攜周嫗護視早集夫力將午乃行夕至漣口附行舟便發夜泊向塘竟夜酣睡

廿五日晴煊南風似夏烈日灼人看桂卷纜行六十里泊泥塘

廿六日晴大熱單衣猶汗守風淥口至夕乃泊山門夜不能寢開窗納涼

須臾風起水湧北風大涼閱卷畢

廿七日涼雨帆風未幾又拉望矣冒雨纜行水流甚迅過晚洲乃上望十五里復帆夕泊雷石遲一刻未得過丰夜得甘寢黃孫始讀桂卷未開廿八日陰待看船至辰乃發巡丁猶怒目疾視以未得開箱篋也雨止風息纜行甚遲夜泊七里站頗爲蟲擾

廿八日陰待看船至辰乃發暮乃至將近來口忽云有風停久之微雨飄灑頃之見日已不能復上遂櫂石鼓步入北門過賀家並僂角而無之矣道溼不可行循城根上遇劉信卿云將訪章月坡立談不欲別乃與同至陝館旋同至安記索麪因要舫樵摸牌四圈云楊伯琇因牌得疾甚殆夜不眠致陰虛也方僮來云船已來迎時至二更遂與劉章同出分道各還唱撈過戍到書院人靜鐙昏齋長俱出書辦亦游不歸幸王文柄作主人耳今日壬寅小滿閏無中氣此誤記也

四月癸未朔大晴失曉起己日滿窗岼樵送果菜齋夫供草具早飯甚儉

午飯甚奢也出堂點名有二十二人王克家來見作揖不如法思俞岱
青之面斥素無威重不能頓儼然也作諭誡之乃不及私室訓過之善
學使舟過與周嫗憑闌看之黃聯鑣又來半揖因并飭之衡人亦有長
沙派漸不可長也哺後涼雨得鄒氏姨書李結甫來更發興騰章同出
二日甲戌小滿陰晴可夾衣晨起最早黃孫亦早讀午下湘課半畢矣從
珠琳巷上答訪結甫詣三否不遇至道署覓號房不得乃徑入尋劉省
卿尙臥未起主人已延賓至客座見所書大字甚佳略談零陵風土遂
還船遣方僮分赴余獨還哺食稍早二更假寐遂至半夜乃起解衣
三日陰未辨色黃孫已起因皆早起則王文柄已持帚在階前蓋欲聽伺
而不料如此早覺也醜人多作怪亦自可笑陳六笙兵備送永物蕭譚
兩學官來點心已過以百合粉待之王國俊來一言不發而退夜命僮
嫗作餅未鐙先睡三更始起小坐旋寢似聞遠鷄鳴然未分明